

Broj: 04-01-908-06/09
Mostar, 22.01.2009. godine

Na osnovu člana 41. Zakona o električnoj energiji („Službene novine Federacije BiH“ broj 41/02, 24/05, 38/05, 61/09), člana 12. stava (1) i člana 14. stava (1) Statuta Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 13/04), kao i člana 31. stava (2) i člana 37. stava (5) Poslovnika o radu Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 59/04), te člana 83. i člana 91. stava (2) Pravilnika o javnim raspravama i rješavanju zahtjeva i žalbi Regulatorne komisije za električnu energiju u Federaciji Bosne i Hercegovine („Službene novine Federacije BiH“ broj 37/05) i člana 23. Općih uslova za isporuku električne energije („Službene novine Federacije BiH“ broj 35/08, 81/08), a postupajući po Žalbi/prigovoru primljenoj u FERK pod brojem 04-01-908/09 dana 07.09.2009. godine žalioca Halilović Muhameda iz S. Gračanice, Živinice, Regulatorna komisija za električnu energiju u Federaciji Bosne i Hercegovine – FERK je, na I redovnoj sjednici održanoj u Mostaru dana 22.01.2010. godine, donijela

ZAKLJUČAK

1. Postupak po Žalbi/prigovoru primljenoj u FERK pod brojem 04-01-908/09 dana 07.09.2009. godine žalioca Muhameda Halilovića iz S. Gračanice, Živinice zbog nepostupanja u propisanom roku Javnog preduzeća Elektroprivreda BiH d.d. - Sarajevo, Podružnice „Elektro distribucija“ Tuzla, po Zahtjevu za izdavanje elektroenergetske saglasnosti podnijetom 01.08.2008. godine, obustavlja se u cijelosti.
2. Ovaj zaključak je konačan i stupa na snagu danom donošenja, te se objavljuje na oglasnoj tabli i web stranici FERK-a.

Obrazloženje

U skladu sa članom 41. Zakona o električnoj energiji, proizvođač, odnosno kvalifikovani kupac električne energije kojem je odbijen pristup mreži ili je nezadovoljan uslovima za pristup, može podnijeti žalbu/prigovor FERK-u, što je propisano i članom 83. Pravilnika o javnim raspravama i rješavanju zahtjeva i žalbi FERK-a, te članom 23. stavom (1) Općih uslova za isporuku električne energije. Članom 23. stavom (2) Općih uslova za isporuku električne energije propisano je da se žalba/prigovor direktno ili šalje poštom nadležnom distributeru u roku od 15 dana od dana prijema odluke distributera o zahtjevu za izdavanje prethodne odnosno elektroenergetske saglasnosti.

Na osnovu navedenog, 07.09.2009. godine FERK je pod brojem 04-01-908/09 primio žalbu/prigovor Muhameda Halilovića iz S. Gračanice, Živinice zbog nepostupanja JP Elektroprivrede BiH d.d.- Sarajevo, Podružnice „Elektro distribucija“ Tuzla u propisanom roku od 30 dana od dana prijema zahtjeva za izdavanje elektroenergetske saglasnosti, a koji zahtjev je žalilac podnio, kako navodi, 01.08.2008. godine. Žalba/prigovor nije FERK-u dostavljena putem JP Elektroprivrede BiH d.d.- Sarajevo,

Podružnice „Elektrodistribucija“ Tuzla. Uz navedenu žalbu/prigovor žalilac nije dostavio dokaz o podnesenom Zahtjevu za izdavanje elektroenergetske saglasnosti, nego je dostavio samo Priznanicu o plaćanju troškova JP Elektroprivreda BiH d.d.-Sarajevo, „Elektrodistribucija“ Tuzla, PJD Živinice od 01.08.2008. godine. FERK je 25.09.2009. godine pod brojem 04-01-908-01/09 primio ponovno žalbu/prigovor ovog žalioca sa istim sadržajem i sa istim prilogom.

Postupajući po podnesenoj žalbi/prigovoru, FERK je 16.10.2009. godine pod brojem 04-01-908-02/09 uputio JP Elektroprivreda BiH d.d.-Sarajevo, Podružnica „Elektrodistribucija“ Tuzla Zahtjev za informacijama kojim je zatražio da ista u roku od pet dana od dana prijema tog zahtjeva, u FERK dostavi sve informacije koje se odnose na žalbu/prigovor Muhameda Halilovića, odnosno kompletan spis predmeta, zatim obrazloženje vezano za predmetnu žalbu/prigovor, kao i kompletnu dokumentaciju na koju se ovo javno preduzeće poziva i kojom raspolaže, uključujući i propise (kompletne) koje je u svom radu primijenio u rješavanju. FERK je ovim Zahtjevom za informacijama zatražio, obzirom na protek vremena, da u istom roku, ovo javno preduzeće iznese i pojasni iz kojih razloga nije još riješila po zahtjevu ovog žalioca.

FERK je 27.10.2009. godine pod brojem 04-01-908-03/09 primio od JP Elektroprivreda BiH d.d.- Sarajevo, Podružnice „Elektrodistribucija“ Tuzla Dopis – dostava informacija po zahtjevu. U tom dopisu je ovo javno preduzeće navelo da su uslovi i postupak izdavanja elektroenergetske saglasnosti definisani Općim uslovima za isporuku električne energije, koji su objavljeni u „Službenim novinama Federacije BiH“ broj 35/08 i u primjeni od 01.07.2009. godine, te da u skladu sa navedenim aktom Podružnica „Elektrodistribucija“ Tuzla prima i vrši obradu zahtjeva za priključenje objekata, koji imaju uredno i blagovremeno izdato odobrenje za građenje. Navedeno je i da pored toga, na području Tuzlanskog kantona ima oko 19.500 nelegalno izgrađenih objekata, čija se legalizacija i priključenje na elektrodistributivnu mrežu vrši u skladu sa Zakonom o izmjenama i dopunama Zakona o uslovima i postupku legalizacije bespravno izgrađenih građevina („Službene novine TK“ broj 5/08). Navedeno je i da je, osim redovnih zahtjeva, ova Podružnica primila veliki broj zahtjeva za izdavanje elektroenergetskih saglasnosti po osnovu legalizacije bespravno izgrađenih građevina, što predstavlja ogromno povećanje u odnosu na normalan režim rada u pogledu prijema i obrade zahtjeva, te da je posebno evidentno značajno povećanje broja predatih zahtjeva za izdavanje elektroenergetskih saglasnosti u mjesecu junu 2009. godine, odnosno prije početka primjene novih Općih uslova za isporuku električne energije. Dalje je navedeno da je Podružnica „Elektrodistribucija“ Tuzla u periodu od 01.07.2008. godine do 30.06.2009. godine izdala 6.330 elektroenergetskih saglasnosti, od kojih je daleko najveći postotak po osnovu legalizacije bespravno izgrađenih objekata, te da je broj izdatih elektroenergetskih saglasnosti u navedenom periodu od 12 mjeseci na nivou broja saglasnosti koje je, prije stupanja na snagu predmetnog Zakona o legalizaciji bespravno izgrađenih građevina, izdavala u peeriodu od tri godine, te da taj podatak najbolje dokazuje o mjerama, koje je poduzimala da obradi sve podnesene zahtjeve. Navedeno je i da pored pojačanih aktivnosti u Podružnici „Elektrodistribucija“ Tuzla nije bilo moguće da u periodu od 01.07.2008. godine do 30.06.2009. godine sve zahtjeve za izdavanje elektroenergetskih saglasnosti i priključenje nelegalno izgrađenih objekata, koji su građeni proteklih 10 godina i više godina, riješi za nekoliko mjeseci ili samo za jednu godinu, te da su u cilju rješavanja što

većeg broja zahtjeva, zaposlenici Podružnice „Elektrodistribucija“ Tuzla uložili maksimalne napore radeći van radnog vremena, međutim da izvjestan broj zahtjeva još uvijek nije obrađen. Navedeno je i da zahtjevi za izdavanje elektroenergetskih saglasnosti koji imaju uredno i blagovremeno izdato odobrenje za građenje, imaju prioritet prilikom redosljeda obrade predmeta, a s obzirom da objekt Muhameda Halilovića nema izdato odobrenje za građenje i da se legalizacija i priključenje na elektrodistributivnu mrežu ovakvih objekata vrši u skladu sa Zakonom o izmjenama i dopunama Zakona o uslovima i postupku legalizacije bespravno izgrađenih građevina, predmet Muhameda Halilovića bit će obrađen u skladu sa redosljedom primljenih predmeta i važećim Cjenovnikom usluga JP Elektroprivreda BiH d.d.- Sarajevo na dan obrade predmeta. U prilogu svog dopisa, JP Elektroprivreda BiH d.d.- Sarajevo, Podružnici „Elektrodistribucija“ Tuzla je dostavila naprijed pomenuti Zakon o izmjenama i dopunama Zakona o uslovima i postupku legalizacije bespravno izgrađenih građevina.

U vezi sa navedenim, FERK je 11.11.2009. godine uputio JP Elektroprivredi BiH d.d.- Sarajevo, Podružnici „Elektrodistribucija“ Tuzla dopis – Izdavanje elektroenergetske saglasnosti broj 04-01-908-04/09. S obzirom na razloge koje je ovo javno preduzeće navelo u svom dopisu, a zbog kojih nije odlučilo o predmetnom zahtjevu za izdavanje elektroenergetske saglasnosti u propisanom roku, FERK je na osnovu Općih uslova za isporuku električne energije („Službene novine Federacije BiH“ broj 35/99), te člana 83. i člana 91. stava (2) Pravilnika o javnim raspravama i rješavanju zahtjeva i žalbi FERK-a, zatražio da JP Elektroprivreda BiH d.d.- Sarajevo, Podružnica „Elektrodistribucija“ Tuzla bez odlaganja, a najkasnije u roku od 15 dana od dana prijema tog dopisa odluči o zahtjevu za izdavanje elektroenergetske saglasnosti žalioca Muhameda Halilovića iz S. Gračanice, Živinice, uz obrazloženje razloga takve odluke, u skladu sa pozitivnim propisima, s uputom o pravu na žalbu/prigovor, te da o istom pisanim putem bez odlaganja obavijesti i FERK.

FERK je 02.12.2009. godine pod brojem 04-01-908-05/09 primio od JP Elektroprivreda BiH d.d.- Sarajevo, Podružnice „Elektrodistribucija“ Tuzla Dopis – Informacija o izdavanju elektroenergetske saglasnosti po žalbi Halilović Muhameda iz Živinica. Ovim dopisom je navedeno javno preduzeće obavijestilo FERK da je JP Elektroprivreda BiH d.d.- Sarajevo, Podružnica „Elektrodistribucija“ Tuzla 04.09.2009. godine žaliocu izdala elektroenergetsku saglasnost broj 208-5465/09, da je ista izdata u skladu sa Općim uslovima za isporuku električne energije („Službene novine Federacije BiH“ broj 35/08, 81/08) i članom 27. Pravilnika o priključcima JP Elektroprivreda BiH d.d.- Sarajevo, na koji je saglasnost dao FERK. Navelo je i da je 14.09.2009. godine žalilac Muhamed Halilović s distributerom potpisao Ugovor o priključenju na distributivnu mrežu broj 208-5470/09, te da je 14.10.2009. godine izvršio uplatu jednokratne naknade za priključenje, a nakon što je 29.10.2009. godine žalilac Muhamed Halilović sa distributerom potpisao Ugovor o korištenju distributivne mreže broj 208-5465/09, te sa snabdjevačem potpisao Ugovor o snabdjevanju električnom energijom tarifnog kupca za kategoriju domaćinstvo broj ST-603-30-208-5465/09, dana 17.11.2009. godine objekat krajnjeg kupca je priključen na elektrodistributivnu mrežu. U prilogu tog dopisa je dostavljena izdata Elektroenergetska saglasnost broj 208-5465/09 od 04.09.2009. godine, kao i gore navedeni, potpisani ugovori, te spis predmeta.

Budući da je JP Elektroprivreda BiH d.d.-Sarajevo, Podružnica „Elektrodistribucija“ Tuzla po Zahtjevu za izdavanje elektroenergetske saglasnosti žalioca Muhameda Halilovića izdalo Elektroenergetsku saglasnost, te da FERK u okviru svojih nadležnosti postupke rješavanja žalbi/prigovora vodi u skladu sa članom 91. stavom (2) Pravilnika o javnim raspravama i rješavanju zahtjeva i žalbi FERK-a, ispunjeni su uslovi za obustavu postupka u cijelosti.

Na osnovu svega navedenog, a u skladu sa članom 29. Zakona o električnoj energiji, odlučeno je kao u dispozitivu zaključka.

POUKA O PRAVNOM LIJEKU:

Protiv ovog zaključka strane u postupku mogu tužbom pokrenuti upravni spor kod Kantonalnog/Županijskog suda u Mostaru u roku od 30 dana od dana prijema zaključka. Tužba se predaje sudu direktno ili mu se šalje poštom preporučeno. Tužba se može izjaviti i na zapisnik kod navedenog suda ili bilo kojeg drugog suda.

PREDSJEDNIK FERK-a
Zdenko Šimunović s.r.